

LIS PREDICJIS DAL MUINI

di pre Josef Marchet - Udin, 1965

Sielzi ben

O soi a visâus che nancje doman no varin messe: pre Scjefin al è avonde vuarît, ma... al ven a stâi che al è il sposalizi di gno nevôt Masin di Lupignan cun Lise di Micjêl, a Gargagnà di Sot.

E je la tierce fantate che e lasse il paîs, in chest carnevâl, par lâ al so distin. Chês altris dôs... ben, par dîle, come che e je, al è pôc ce vaîlis. Une e jere une pipine dute in gringule come se e fos stade simpri in vitrine: dopo che la vevin metude sul gjornâl come la plui biele dal circondari, e jere cressude di presit, che Diu nus vuardi e nujaltri! E veve zurât di no sposâ un furlan nancje se al jere indorât, par vie che i furlans no san fevelâ di amôr; e cussì e à cjatât un toscan che la mene a fâ la massarie intune fameone i cugnâts vedrans, bogns di nuie e plens di ande. Chê altre, Tine di Toni, e jere una scraçule, simpri cu la gose par aiar, che si la sintive a cuarnâ fin da pît Cumugne, una trombete stonade come chê e a fasin i fruts cu lis fueis di coce, una lengonate sfaçade che e meteve sù una rivoluzion in di, cun fradis, cun sûrs, cun amîs e cognossints. Par fortune, e je lade a finîle intun cjasâl fûr di man, dulà che e po scolâsi di flât cence fâ trimâ i mûrs.

Cheste, invezit - Lisute di Micjêl - e je una robite di sest, che al displâs viodile a partî: una frute di cjâf e di cûr, plene di sintiment, brave di tantis robis, che e sa stâ sul so jessi cence mostrâsi ni come una contesse ni come una svuatare. E à vût un sôl dituart - oh lassaitmi, che o mi sbrochi! - chel di inçopedâsi daprûf di chel corli di gno nevôt. E meritave alc di miôr! No che Masin al sei trist: ma curt di curdele, nome avonde. Dopo che al è stât un pâr di agns a vore jù pes Bassis, al è tornât dongje cuntun fâ di sbreghemontagnis che al fâs dûl ancje ai raclis. E "jo!" di ca, "jo!" di là tant che al fos lui il paron dal mont: lui al à sintût, lui al à provât, lui al à cognossût... Dopo dut al è stât nome a menâ la cariole intai paîs dai maramans, dulà che a fasevin una strade, e la vile plui dongje e jere lontane trê miis e al jere un paison di bifolcs. O ai pôre - magari cussì no - che Lisute e vebi di visâsi masse adore di jessi colade tal çondar. Pecjât, parcè che, cuant che una femine no po stimâ il so cristian, la sagra dal amôr e riscje di jessi finide. O savês pûr ce fin che e à fat puare Sule Miniute: e veve volût cjoli gno cusin Nibil nome parcè che al jere un toc di temul che al semeave Florean dal Palaç... Si sa po: una stangje di fantat che al faseve vignî la aghegole a tantis; e Sule che e jere stade aes scuclis e che e jere una frutate finute e dispatussade, e contave, in confidence e mê Mariane, che se gjoldeve a sintîsi strenzi in chei braçs di fier... Biadace: se al è par chel,

e podeve sposâ il turcli di Bortolat che la varès sfrancjade cun trê zîrs di stangje! Ma no dopo ve, cuant che Nibil al tacà a doprâ i braçs par molâ sgnesuslis, no si laudà plui de sô fuarçate!

Vêso capît voaltris dôs, poleçatis, la jù, che o stais cisicant come l'ardiel tal fersorin? Chescj a son spielis che no siervin par petenâsi la cjaveade, ma par insegnâ il vivi dal mont a cui che al sa capî e considerâ. E cun chest us doi la buine sere.